



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-I/25-3-40-346-6/21**
Datum: **01.10.2021. god.**

„Agencija za vodno područje rijeke Save“ Sarajevo rješavajući po zahtjevu pravnog lica „BINGO“ d.o.o. Tuzla za donošenje rješenja o vodnoj dozvoli za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta i ispuštanje tehnoloških otpadnih voda u postupku rada farme za tov brojlera, izgrađenih u naselju Vukovije Donje, općina Kalesija, na osnovu člana 139. stav (1) tačka 3. i 10. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi:

R J E Š E N J E **o vodnoj dozvoli**

1. Pravno lice „BINGO“ d.o.o. Tuzla obratio se ovoj Agenciji, za donošenje rješenja o vodnoj dozvoli za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta i ispuštanje tehnoloških otpadnih voda u postupku rada farme za tov brojlera izgrađenih u naselju Vukovije Donje, općina Kalesija, kapaciteta 156 000 pilića po turnusu, na zemljištu označenom kao k.č. broj: 2712 i 2713 K.O. Vukovije, općina Kalesija.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola, od strane drugih nadležnih organa, a sve u skladu sa važećim zakonskim propisima, odlukama i dr.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
 - 3.1 Da pravno lice, izgrađene objekte farme za uzgoj pilića sa pratećim objektima, održava u funkcionalnom stanju i koristi u skladu sa njihovom namjenom i uslovima iz ove vodne dozvole.
 - 3.2 Da se završi izgradnja vodonepropusnih lagune/đubrišnih jama (odgovarajućeg kapaciteta) za privremeno odlaganje prostirke i đubriva a prije aplikacije na poljoprivredne površine na način da se onemogući isticanje procjednih voda i uticaj oborinskih voda. Radove okončati u roku od 3 mjeseca, a o završetku radova pismeno obavijestiti ovaj organ uz priloženu odgovarajuću foto dokumentaciju.
 - 3.3 Da se zbrinjavanje otpadne vode od pranja objekta za tov pilića i opreme u istom, vrši u izgrađenoj vodonepropusnoj sabirnoj jami bez preliva.
 - 3.4 Čišćenje separatora i pratećih elemenata, te odvoz i konačno zbrinjavanje otpadnog mulja i taloga, kao i opasnog otpada sa lokacije predmetne poslovnog objekta može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja taložnika i separatora ulja i masti, neophodno je voditi službenu evidenciju i arhivu.
 - 3.5 Da se čišćenje i pražnjenje vodonepropusne sabirne jame bez preliva, u koju se zbrinjavaju tehnološke otpadne vode od pranja objekta i opreme, vrši pravni subjekt ovlašten za tu vrstu djelatnosti, prema posebnom ugovoru.

- 3.6 Da se, nakon pokretanja proizvodnje, đubrivo i prostirka odlažu u lagunu/đubrenku tako da se obezbijedi zrenje istog prije konačne dispozicije đubriva na poljoprivredne površine kao i da se spriječi nekontrolisano rasipanje tečnog i krutog otpada po okolnom zemljištu.
- 3.7 Da korisnik obavezno praktikuje suho čišćenje prije pranja vodom, da bi se uklonile organske nečistoće sa radnih površina, trošilo manje vode za pranje i time smanjilo zagađenje u otpadnim vodama.
- 3.8 Da se, u skladu sa propisima iz oblasti zaštite okoliša, vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
- 3.9 Otpad koji nastaje u postupku rada farme za uzgoj pilića, te mulj iz postrojenja za prečišćavanje otpadnih voda ne smije se odlagati na česticu «vodno dobro», odnosno u vodotoke i na njegove obale.
- 3.10 Da se privremeno i konačno zbrinjavanje otpada uginulih pilića i drugih nusprodukata koji nastaju u postupku rada farme za uzgoj pilića, vrši u skladu sa Zakonom o veterinarstvu i Pravilnikom o načinu postupanja sa životinjskim lešinama i otpadom životinjskog porijekla i propisima iz oblasti zaštite okoliša.
- 3.11 Ukoliko radom predmetnog objekta dođe do promjene režima površinskih ili podzemnih voda, a te promjene prouzrokuju štete ma kakvog karaktera, korisnik vodne dozvole je obavezan uzroke štete otkloniti, a nastalu štetu nadoknaditi.
- 3.12 Investitor je obavezan pridržavati se svih mjera i uslova, propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima farme za tov pilića sa pratećim objektima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
6. U slučaju vanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
8. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godine od dana pravosnažnosti ovog rješenja.
9. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.
10. Ova vodna dozvola može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev.

Obrazloženje

Pravno lice „BINGO“ d.o.o. Tuzla obratio se ovoj Agenciji, za donošenje rješenja o vodnoj dozvoli za aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta i ispuštanje tehnoloških otpadnih voda u postupku rada farme za tov brojlera koji se nalazi u naselju Vukovije Donje, općina Kalesija, kapaciteta 156 000 pilića po turnusu, na zemljištu označenom kao k.č. broj: 2712 i 2713 K.O. Vukovije, općina Kalesija.

U provedenom postupku dostavljena je i pregledana sljedeća dokumentacija:

- Rješenje o izmjenama podataka u sudskom registru broj: 032-0-Reg-21-001179 od 23.07.2021. godine, izdato od strane Općinskog suda u Tuzli-ovjerena kopija,
- Rješenje o upisu u Jedinstveni registar obveznika indirektnih poreza br. 04/1-17-1-UPJR/1-1558-2/13 od 10.05.2013. godine, izdato od strane Uprave za indirektno-neizravno oporezivanje Banja Luka-ovjerena kopija,
- Ovjerena kopija Rješenja o poreskoj registraciji izdatoj od Porezne uprave Kantonalni ured Sarajevo od 05.02.2013. godine,
- Rješenje o vodnoj saglasnosti UP-I/25-1-40-189-4/19 od 08.04.2019. godine izdato od strane «Agencije za vodno područje rijeke Save» Sarajevo,
- Rješenje o odobrenju za građenje broj: UPI/03-19-2-191/20 od 24.11.2020. godine izdato od strane Federalnog ministarstva prostornog uređenja,
- Glavni projekat sakupljanja, tretmana i ispuštanja otpadnih voda kompleksa farme za tov brojlera u Vukovijama, općina Kalesija, pravnog lica „BINGO“ d.o.o. Tuzla urađen od strane „TQM“ d.o.o. Lukavac, februar 2020 godine,
- Dokaz o uplaćenju upravnoj i administrativnoj taksi.

Postupajući po podnesenom zahtjevu, u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH“ broj 31/15, 55/19 i 41/20), ovaj organ je pokrenuo upravni postupak, te je dana 25.08.2021. godine izvršen uviđaj na predmetnoj lokaciji, o čemu je sačinjen Zapisnik broj: UP-I/25-3-40-346-3/21.

Na osnovu dostavljene dokumentacije uz predmetni zahtjev i izvršenom uviđaju na predmetnoj lokaciji, utvrđeno je sljedeće:

Postojeći objekti farme smješteni su naselju Vukovije Donje, općina Kalesija, na zemljištu označenom kao k.č. broj: 2712 i 2713 K.O. Vukovije, općina Kalesija. Kapacitet farme je 156 000 pilića po turnusu.

Snabdijevanje vodom za potrebe predmetnih objekata biće obezbijedeno priključkom na gradski vodovodni sistem za što je podnosilac zahtjeva pribavio Načelnu saglasnost za priključak na vodovodnu mrežu broj: NS -6-23.1-213/19 od 10.07.2019 godine izdato od strane JP „Vodovod i kanalizacija“ d.o.o. Kalesija.

U postupku rada farme za tov brojlera će nastajati tehnološke otpadne vode od pranja opreme i prostora koje će se zbrinjavati u dvije vodonepropusne sabirne jame bez preliva. Pražnjenje jame će se vršiti od strane ovlaštene firme prema sklopljenom ugovoru.

Oborinske onečišćene vode sa radnih platoa i internih saobraćajnica će se prikupljati sistemom slivnika i kanalizacije te odvesti na separator masti i ulja. Prečišćena voda će se preko okna za monitoring ispuštati u rijeku Gribaju.

Kruti otpad koji će nastajati pražnjenjem objekata za smještaj brojlera će se privremeno odlagati u vodonepropusne lagune odgovarajućeg kapaciteta (3 lagune-đubrenke), a potom odvoziti na dalju preradu ili na poljoprivredne površine.

U projektnoj dokumentaciji su predviđene i detaljno opisane dodatne i standardne mjere zaštite u III zoni zaštite izvorišta „Krušik“ koje će se morati obavezno provoditi putem zabrana, ograničenja i drugih oblika kontrole ljudskih aktivnosti radi smanjenja rizika od zagađenja izvorišta ili drugih

uticaja koji se mogu nepovoljno reflektovati na stanje izvorišta, njegovu izdašnost, kvalitet i zdravstvenu ispravnost vode.

Lokacija predmetnih parcela je cca 150 m udaljena od vodotoka rijeke Gribaje.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, člana 12. i 13. Pravilnika o sadržaju, obliku, uvjetima načinu izdavanja i čuvanja vodnih akata.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada i Odlukom o visini posebnih vodnih naknada).

Na osnovu provedenog postupka konstatuje se da je podnosilac zahtjeva, „BINGO“ d.o.o. Tuzla, ispunio minimum uslova za izdavanje vodne dozvole za ispuštanje tehnoloških otpadnih voda i aktivnost koja može privremeno ili trajno degradirati kvalitet voda ili ometati poboljšanje njihovog postojećeg kvaliteta voda kao posljedica rada poslovnog objekta-farme za tov pilića, te je riješeno kao u dispozitivu ovog rješenja.

Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi («Službene novine Federacije BiH», br. 6/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Voditelj postupka:

Meho Čaušević, B.Sc.ing.građ.

Prilog:

Glavni projekat i aneks glavnog projekta sakupljanja, tretmana i ispuštanja otpadnih voda kompleksa farme za tov brojlera u Vukovijama, općina Kalesija, pravnog lica „BINGO“ d.o.o. Tuzla urađen od strane „TQM“ d.o.o. Lukavac, februar 2020 godine;

Po ovlaštenju
Rukovodilac sektora za izdavanje vodnih akata



Haris Ališehović, dipl.inž.građ

Dostaviti:

- «Bingo» d.o.o. Tuzla, Bosanska Poljana bb, Tuzla (prilog)
- ⊕ AVP Sava, ISV – Vodna knjiga
- Sektor 50
- Sektor 40, arhiva
- Oglasna tabla AVP-Sava Sarajevo